

上薦剃手尊覺奉剃左御髮下薦剃手公顯奉懸御湯此間上薦唄師公舜唱毀形唄次下薦剃手公顯奉剃右髮尊覺懸御湯此間下薦唄師憲覺唱唄次剃除了左右御髮裏檀紙付札件札兼書儲云々光能朝臣所作歟次下薦剃手奉剃髭御剃髮之間和菊奉懸之次法皇入御簾中脫俗服令著法衣給次供御手水此間僧徒撤雜役具御髮暫置同御厨子次法皇取御袈裟出御次戒師奉除周羅髮件周羅髮項三五莖殘之見戒律作法云々次定御法名行次戒師置袈裟於袖上頌文大哉解脫服以御袈裟奉授法皇以左右手令受給次捧御袈裟一拜即返給戒師如此三反了法皇令著給永治寬通法眼奉結御袈裟緒今度尊覺法印結之次召御念珠菩提子水精裝束念珠戒師被獻云々次遇哉值佛者偈次奉授沙彌十戒次說戒僧次神分次廻向次令授菩薩戒給被授申御法名行眞日來被案撰歟次法皇入御簾中次戒師復本座次卷南廂御簾次給布施先戒師

綾被物一重 太政大臣取之 判官代成隆成隆一作盛隆傳之

布施二裏絹裏白布各七反 民部卿光忠治部卿光隆取之

布袴御裝束一具裏白絹裏當日著御之御裝束也脫御之後帖之裏調也 皇后宮大夫實定取之

直衣御裝束一具裏同 權大納言隆季卿取之

鈍色裝束一具 權大納言實房卿取之

長絹二裏各五匹 綿二裏各百匹 已上四裏權中納言邦綱以下取之

次唄師二口

各綾被物一重 左大臣內大臣取之判官代光長奉經傳奉之

布施一裏各白布五段 參議散三位取之

鈍色裝束一具

長絹一裏五匹 綿一裏五十兩 已上納言以下取之